

COMUNICATO n. 2321 del 27/08/2025

De Provinz denkt en de familie za tea' innzohn pazaitn

Tauerkòrt ver de òllgamoà'meivernsemittln ver de studentn va de zboate schual

[Mòcheno] Pet en verglaimern se van u'vòng van schualn as bart sai' en mita as de 20 van leistagest, de Provinz va Trea't, denkt en de familie as hom studentn as gea' en de zboate schual, inngahòltn de u'learòrbetn aa, za tea' pazaitn innzohn de tauerkòrt ver de òllgamoà'meivernsemittln. Der kost ist nèt kemmen gaheachert ver en jorschual 2025-26 ont der ist va zboa'sk euro ont umensist van viarte kinn envire. De tauerkòrt ist vrai ont gip de moglechkait za prauchen òlla de mittln va linea - stòttbus ont ausstòttbus ont as de provinzallich - van earste to van leistagest 2025 finz as de 31 van agest 2026.

"Der trentiner òllgamoà'meivernsemittl ist jor ver jor an ausòndern dinst ver de studentn van zboatn schualn va zboate tritt ver za gea' za schual. Abia Provinz ber denken as bichte ist versichern en de jungen ont en de familie de moglechkait za prauchen de netzn keing en de schualnzentrum avn lònt, asou za verlaichtern s rècht en learnen turch de vraihait za meivern se avn lònt aa. En de glaiche zait, pet en bidersong as de amministrazion de studentn untermittelt, ber gem en de moglechkait za riarn se avn lònt en an pahòltlegen vurm, asou as minder kostn gip ver de umbèlt ont en zòmlem van privatverkearmittldinst", hòt derklort der asessor en de urbanistik, energi ont verkearmittln, Mattia Gottardi.

Men lont inn de familie za leing drinn gèlt en de zaitkòrt bail en de gilte zait en de zeitnomtn va Trentino trasporti oder Trenitalia. Ver de kloa'nekaitn iber en de virm za zohn de zaitkòrt ist s mu men gea' za pasuachen de websait va de Provinz va Trea't (af de sait: <https://www.provincia.tn.it/Servizi/Abbonamenti-trasporto-studenti-delle-scuole-superiori>), bou as pesser patschrim ist der vurm ver za kriang de zaitkòrt a'ne zohn ver en viarte kinn.

Ibersetz gamòcht van Sprochtirl va de Tolgamoà'schòft Hoa Valzegu' ont Bersntol

(cdt)